

## Selelekela sa Selekane



---

### SABATHA MANTSIBOEA

#### **Bakeng sa Boithuto ba Beke Ena Bala:**

Gen. 9:15; Esa. 54:9; Gen. 12:1-3, Bagal. 3:6-9, 29; Exod. 6:1-8; Jer. 31:33, 34.

#### **Teman'a Khopolo:**

“Me joale ekare ha le ka fela la utloa lentsoe la ka, la boloka selekane sa ka, le tla ba letlotlo la ka la sebele har'a lichaba tse ling kaofela, etsoe lefatše lohle e le la ka” (*Exoda 19:5*).

**B**eke e fetileng e qetelletse ka ho oa ha botho, ka lebaka la sebe sa batsoali ba rona ba pele. Beke ena ke kakaretso ea kotara eohle, ha re nka letsatsi ka leng ho sheba lilekane tsa pele, tseo kaofela ha tsona, ka tsela ea tsona, e neng e le pontšo ea 'nete ea joale ea selekane sa 'nete, se ileng sa tiisoa Golgotha ka mali a Jesu, seo rona re leng Bakreste, re kenang ho sona le Morena oa rona.

Re qala ka selekane seo Molimo o ile oa se etsa le Noe ho mo lopolla timelong le lelapa la hae. Re fetele seleaneng le Abrahama, se manoni se tletseng tšepiso ea rona bohle; e be re ea seleaneng sa Sinai le bohlokoa ba se ileng sa phatlalatsa moo; e be re qetella ka ho talima selekane se secha, seo tsohle li neng li supa ho sona. Tsena tsohle, re feela, re tla ithuta tsona ka botebo libekeng tse 'maloa tse tla latela. Bekeng ena re thalatsa mahlo feela.

**Beke ka Bokutšoanyane:** Lentsoe selekane le bolela'ng? ke lintlha li fe tse etsang selekane? Selekane seo Molimo o ile oa se etsa le Noe ke se fe? Ke tšepo e fe e neng e fumanoa seleaneng le Abrahama? Ke karolo e fe eo tumelo le mesebetsi li e nkang lehlakoreng la motho la selekane? A na selekane e mpa e le tumellano feela, kapa se na le lintlha tsa kamano ho sona? Mooko-taba oa “selekane se secha” ke o fe?

*\*Ithute thuto ea beke ena ho lokisetsa Sabatha sa la 10 'Mesa.*

## Tsa Mantlha ka Selekane

“Me ke tla tiisa selekane sa ka, se mahareng a ka le uena, ke u atisa haholo-holo” (Gen. 17:2). “Lentsoe la se-Heberu le fetoletsoeng e le ‘selekane’ (le hlahang makhetlo a ka bang 287 Testamenteng ea Khale) ke berith. Le ka boela la fetoleloa e le ‘testamente’ kapa ‘thato ea ho qetela.’ Motso oa lona ha oa hlaka, empa le se le fihletse ho bolela “se tlamang batho ba babeli.” Leha ho le joalo, le ne le sebelisoa ho bolela mefuta e fapaneng ea ‘setlamo,’ e le pakeng tsa motho le motho le pakeng tsa motho le Molimo. Le sebelisoa hangata moo mahlakore ka bobeli e leng banna, le ka ho khetholloha borapeling moo selekane se leng mahareng a Molimo le motho. Tšebeliso ea borapeli e ne e le papiso e neng e le holim’a tšebeliso e tloaelehileng feela e nang le moelelo o tebileng.”—J. Arthur Thompson, “Covenant (OT),” *The International Standard Bible Encyclopedia*, revised edition (Grand Rapids, MI: William B. Eerdmans Publishing Company, 1979), vol. 1, leq. 790. Joalo ka selekane sa lenyalo, selekane sa Bible se hlalosa bobeli kamano le tlhophiso. Ha e le tlhophiso, selekane sa Bible se na le lintlha tsena tsa mantlha:

1. Molimo o ne a tiisa litšepiso tsa selekane ka boitlamo (Bagal. 3:16; Baheb. 6:13, 17).
2. Boikarabello ba selekane e ne e le ho etsa thato ea Molimo joalo ka ha e hlalositsoe ho Melao e Leshome (Deut. 4:13).
3. Mekhoa eo ka eona boikarabello ba selekane sa Molimo se qetellang se phethahalitsoe ke ka Krete le leano la pholoho (Esa. 42:1, 6).

**Talima lintlha tse tharo tse thathamisoeng kaholimo (Litšepiso tsa Molimo, kutlo ea rona, le leano la pholoho). Ke joang u ka bonang lintlha tsee li le tšebetsong leetong la hau le Morena? Ngola seratsoana se hlahosang kamoo li bonahalang bophelong ba hau ha joale.**

---

Testamenteng ea Khale, tlhophiso ea mahlabelo ea litšoantšiso e ne e ruta batho ka leano la pholoho ka botlalo. Ka matšoa a eona, ba patriareka le Iseraele ba ne ba ithuta ho sebelisa tumelo ho Mopholosi ea tlang. Ka litšebeletso tsa eona, ea soabetseng molato oa hae o ne a fumana tšoarelo ea sebe le tokollo molatong. Ka mokhoa o joalo litlhothonolofatso tsa selekane li ka fumanoa, ‘me kholo ea moea—e buseletsang setšoantšo sa Molimo bophelong—e ba e tla tsoela pele, leha botho bo hlolehile ho tšoarella lehlakoreng la bona la tumellano.

**Leha ho na le lilekane tse etsaoang mahareng a batho, tšebeliso ea mantlha ea letsoe berith Bibeleng ea se-Heberu e sebetsana le kamano e mahareng a Molimo le botho. Ha re talima eo Molimo e leng Eena le hore re bo mag ha re bapisoa le Eena, selekane sa mofuta oo se ka bontša kamano e joang?**

## Selekane le Noe

“Empa ke tla hlaba selekane sa ka le uena, ‘me u tla kena arekeng, uena, le bara ba hao, le mosali oa hao, le basali ba bara ba hao hammoho le uena” (Gen. 6:18).

Temaneng e kaholimo lentsoe selekane le hlaha lekhetlo la pele ka Bibeleng, ‘me moeelong ona, Molimo o qeta ho bolella Noe ka qeto ea Hae ea ho timetsa lefatše ka lebaka la ngatafalo ea bokhopo e tsoelang pele. Leha tšenyeho ena e tla tla ka Moroallo o akaretsang lefatše, Molimo ha o lahle lefatše leo o le bopileng. O tsoela pele ho fana ka selekane sa kamano se ileng sa qala ho kenngoa tšebetsong kamor’a ho Oa. Ea halalelang ea fanang ka sehlabelo ka Sebele ke motheo oa tšireletseho ea Noe. Joalo ka Molimo o bolokang selekane, Morena o tšepisitse ho sireletsa litho tsa lelapa tse neng li ikemiselitse ho phela kamanong e tiileng le Eena, e tlisang kutlo.

**Na selekane le Noe se ne se le lehlakore le le leng? Hopola hore taba ea selekane e supa hore ho teng mahlakore a fetang bo ‘ngoe. Na Noe le eena o n’a na le karolo eo a lokelang ho e khotsofatsa tumellanong ee? Ke thuto e fe e teng bakeng sa rona karabong ea potso ee?**

---

Molimo o bolella Noe hore ho tlo ba le moroallo ‘me lefatše le tlo timetsoa. Empa Molimo o etsa tumellano le eena, eo ho eona a tšepisang ho pholosa Noe le lelapa la hae. Ka mokhoa o joalo, ho ne ho hlile ho thatafetse, hobane haeba Molimo o ne o sa phethahatse tšepiso ea Oona, ho sa natse hore Noe o etsa eng, a ka be a ile a fielloa le lefatše kaofela ha lona. Molimo o itse o tla hlaba “selekane” le Noe. Lentsoe leo ka bo lona le bontša boikemisetso ba ho tšepahalla seo u reng u tla se etsa. Ha se polelo feela ea ho nkuoa ke maikutlo. Lentsoe ka bolona le tla le tletse ka boitlamo. Nahana haeba Morena a n’a itse ho Noe, “Bona, lefatše le tlo timela ka moroallo o tšabehang, ‘me ho ka etsahala ke u pholose, ho ka etsahala ke se ke ka u pholosa. Ho ho le joalo, etsa sena u etse le ane re tla bona na ho etsahala’ng, empa ha ke tšepise letho.” Polelo tse joalo ha li tle le mofuta oa tiisetso le tšepiso e fumanehang ho lentsoe selekane ka bolona.

**Batho ba bang ba pheha khang ea hore moroallo oa Noe ha oa ka oa akaretsa lefatše empa e ne e le ketsahalo ea lehae feela. Ha ho le joalo, moeelong oa seo Molimo o se tšepisang ho Genese 9:15 (sheba le Esa. 54:9), nako tsohle ha moroallo oa lehae o etsahala (‘me li bonahala li etsahala nako eohla), tšepiso ea Molimo ea selekane ea rojoo. Ka ho fapana, taba ea hore ha ho so ka ho ba le moroallo o mong o akaretsang lefatše ho pakahatsa bonnete ba tšepiso ea Molimo ea selekane. Ka bokhutšoanyane, see se re bolella eng tsela eo re ka tšepang litšepiso tsa Hae?**

## Selekane sa Abrame

**“Ke tla hlohonolofatsa ba u hlohonolofatsang, ke rohake ba u rohakang, ‘me mefuta eohle ea lefatše e tla hlohonolofalla ho uena” (Gen. 12:3). Bala 12:1–3. Thathamisa litšepiso tse ikhethileng tseo Molimo o ileng oa li etsetsa Abrame.**

---

---

---

Hlokomela hore har’ a litšepiso tsena Molimo o re ho Abrame “mefuta eohle ea lefatše e tla hlohonolofalla ho uena” (Gen. 12:3). See se bolela’ng? Malapa ohle a lefatše a ile a hlohonolofala joang ho Abrame? Sheba Bagalata 3:6–9. Ke ka litsela li fe u ka bonang litšepisong ee ea pele tšepiso ea Jesu Mesia? Sheba Bagal. 3:29.

Mona, tšenolong ea pele e halalelang e tlalehiloeng ho Abrame, Molimo o ile a tšepisa ho kena kamanong e tiileng ea nako e telele le eena, le pele a sebelisa puo e buang ka ho etsa selekane. Mantsoe a supang selekane seo Molimo o neng o tla se etsa a tla hamorao (Gen. 15:4–21, Gen. 17:1–14). Ka nakoana, Molimo o fana ka kamano ea Molimo le motho ea boleng bo holimo. “Ke tla” e phetakuoeng ho Genese 12:1–3 e supa botebo le boholo ba ba seo Molimo a fanang le ho tšepisana ka sona.

Hape, Abrame o fumana taelo e le ‘ngoe, empa e le kang, “Tsamaea.” O ile a latela ka tumelo (Baheb. 11:8) empa e seng hore a tle a fumane tlhohonolofatso e tšepisitsoeng. Kutlo ea hae e bile karabo ea tumelo kamanong ea lerato, eo Molimo o neng o lakatsa ho e theha. Ka mantsoe a mang, Abrame o n’ a sa nts’ a lumela ho Molimo, a s’ a nts’ a tšepa Molimo, a s’ a nts’ a na le tumelo litšepisong tsa Molimo. O ne a lokela ho etsa joalo; ho seng joalo, a ka b’ a sa sia lelapa labo le lefatše la baholo ba hae ho tloha sethathong e be o ea sebakeng seo a sa se tsebeng. Kutlo ea hae e ile a senola tumelo ea hae ho batho le manyeloi ka bobeli.

Abrame, le khale hoo, o ile a senola kamano ea mantlha ea tumelo le mesebetsi. Re pholoso ka tumelo, tumelo e tlisang mesebetsi ea kutlo. Tšepiso ea pholoho e tla pele; mesebetsi e latele. Leha ho ka se be le setsoalle sa selekane le tlhohonolofatso kantle ho kutlo, kutlo eo ke karabelo ea tumelo ho seo Molimo a s’ a nts’ a se entse. Tumelo e joalo e bontša tšiea e ho 1 Johanne 4:19, “Rea mo rata [Molimo], kahobane e le eena ea re ratileng pele.”

**Bala Genese 15:6. E bontša joang, ka litsela tse ngata, motheo oa litšepiso tsohle tsa selekane? Hobaneng ha tlhohonolofatso ee e le ea bohlokoa ka ho feta tsohle?**

## Selekane le Moshe

**Bala Exoda 6:1–8 e be u araba lipotso tsena:**

**1. O n'a bua ka selekane se fe? Sheba Gen. 12:1–3.**

---

**2. Ke joang Exoda e ne e le phethahatso, lehlakoreng la Hae, ea litšepiso tsa selekane?**

---

**3. Ke lintho li fe tse tsoanang mahareng a seo Molimo o se tšepisitseng batho moo le seo o se tšepisitseng Noe pele ho Moroallo?**

---

Kamor'a Exoda, bana ba Iseraele ba ile ba amohela selekane Sinai, se fanoa moeelong oa topollo le bokhoba (Exod. 20:2) hape se phuthetse litaelo tsa Molimo tsa sehlabelo bakeng sa tefelo le tsoarelo ea sebe. Joalo ka tse ling kaofela, e ne e le selekane sa mohau, mohau oa Molimo o neoang sechaba sa Hae. Selekane sena se ne se pheta, ka litsela tse ngata, mookotaba o neng o thatiselletsoa seleaneng le Abrahamama:

1. Kamano e khethehileng ea Molimo ho sechaba sa Hae (bapisa Gen. 17:7, 8 le Exod. 19:5, 6).

2. E ne e tla ba sechaba se sehlo (bapisa Gen. 12:2 le Exod. 19:6).

3. Kutlo e ne e hlokeha (bapisa Gen. 17:9–14; Gen. 22:16–18 le Exod. 19:5).

“Hlokomela tatellano mona: Jehova o qala ka ho pholosa Iseraele, eaba o ba fa molao oa Hae hore ba o boloke. Tatellano e tsoanang e ntse e le teng le tlas'a evangeli. Kreste o qala a re pholosa sebeng (sheba Johanne 1:29; 1 Bakor. 15:3; Bagal. 1:4), e be o phela molao oa Hae ka ho rona (Bagal. 2:20; Baroma 4:25; 8:1–3; 1 Petrose 2:24).”–*The SDA Bible Commentary*, pok. 1, leq. 602.

**Bala Exoda 6:7. Ke eng e fe e hlahellang karolong ea pele, moo Jehova a reng e tla ba sechaba sa Hae ‘me Eena e tla ba Molimo oa bona? Lemoha tsela seo litaba li leng ka teng mona. Ba tla ba se seng ho Molimo, ‘me le Molimo o tla ba se seng ho bona. Molimo ha o batle feela ho amana le bona ka tsela e khethehileng; o batla le bona ba amane le Eena ka tsela e khethehileng. Na Morena ha a batle kamano e tsoanang le ho rona kajeno? Na karolo ea pele ea Exoda 6:7 e bontša kamano ea hau le Morena, kapa u motho e mong feela eo lebitso la hae le leng libukeng tsa kereke? Haeba karabo ea hau karolong ea pele ea potso ke E, fana ka mabaka.**

## Selekane se Secha (Jer. 31:31–33)

Litemaneng tsena ke lekhetlo la pele Testamenteng ea Khale ho buuo ka se tsejoang e le “selekane se secha.” Ho buuo ka sona moelelong oa ho khutla oa Iseraele kholehong, ‘me e bua ka litlhoonolofatso tseo ba tla li amohela ho tsoa ho Molimo. Hape, joalo ka ho tse ling kaofela, ke Molimo a tlang selekane, ‘me ke Molimo ea tla se phethahatsa ka mohau oa Hae.

Hlokomela, hape, puo e sebelisitsoeng. Molimo o bua ka Eena e le monna oa bona; o bua ka ho ngola selekane sa Hae lipelong tsa bona; ‘me o sebelisa puo e seleaneng sa Abraham, O re e tla ba Molimo oa bona, ‘me bona e tla ba sechaba sa Hae. Ka mokhoa o joalo, joalo ka pele, selekane ha se feela tumellano e tlamang ka molao, joalo ka makhotleng a molao kajeno, empa e sebetsana le se fetisang.

**Bala Jeremia 31:33. E bapise le Exoda 6:7, e pharalatsang karolo ea selekane le Iseraele. Hape, ke ntlha-kholo e fe e hlahellang moo? Molimo o batla eng ho sechaba sa Hae?**

---

**Bala Jeremia 31:34. Bapisa se boleloang mona le Johanne 17:3. Ke taba e fea ea mantlha eo Jehova a e etsang e ahang motheo oa kamano ee?**

---

Ho Jeremia 31:31–34, motho a ka bona ka bobeli lintlha tsa mohau le kutlo, joalo feela ka lilekaneng tse ling tse tllileng pele. Molimo o tla tsoarela libe tsa bona, Molimo o tla kena likamanong le bona, ‘me Molimo o tla fana ka mohau oa Hae maphelong a bona. Ka lebaka leo, batho hoa bona ke ho mo utloa; empa e seng ka tsela e se nang boinahano, e latelang feela empa e le hobane ba mo tseba, hobane ba mo rata, le hobane ba batla ho mo sebeletsa. Sena se phuthela moelelo oa kamano ea selekane eo Morena a e batlang le sechaba sa Hae.

**U utloisisa taba ee ea molao o ngoloang lipelong tsa rona joang? Na e bolela hore molao o so hlahoseha ho latela maikutlo a motho ebile e ba o ea ka motho ka mong, hoo u ka tolakoang le ho sebelisoa ho latela kelello ea motho ka mong? Kapa e bolela se seng se sele? Haeba ho le joalo, ke eng?**

## Ho Ithuta Haholoanyane:

Read Ellen G. White, “Abrahama Kanana,” maq. 132–138, ho *Patriarchs and Prophets*; “Ba Thusoa ke Baporofeta ba Molimo,” maq. 569–571, ho *Prophets and Kings*. “Joko e tlamellang bosebeletsing ke molao oa Molimo. Molao o moholo oa lerato o senotsong Edene, oa phatlalatsa Sinai, le seleaneng se secha o ngotsoe pelong, ke ona o tlamellang motho oa mosebeletsi thatong ea Molimo. Haeba re ne re lesetsoe ho latela litšekamelotso rona, e be re ikela ka ho ea ka lithato tsa rona, re ne re tla oela makhotleng a Stane re fetohela ba nang le mekhoha ea hae. Kahona, Molimo o re boloka kahare ho meeli ea thato ea Hae, e phahameng, e bokhabane, hape e phahamisang. O lakatsa ha ka mamello le ka bohlahe re ka nka boikarabello ba rona ba bosebeletsi. Joko ea bosebeletsi Krete ka sebele sa Hae o ile a e jara sebopeng sa motho. O ile a re, ‘Ho etsa ho ratoang ke uena, Molimo oa ka, ke sona seo ke se ratang, molao oa hau o ngoliloe pelong ea ka.’ lipes. 40:8. ‘Hobane ke theohile leholimong, e seng ho etsa ho ratoang ke ‘na, empa e le ho etsa ho ratoang ke ea nthomileng.’ Johanne 6:38. Lerato la Molimo, cheseho ea khanya ea Hae, le lerato la motho ea oeleng, li tlisitse Jesu lefatšeng ho tla hlokofala le ho shoa. Sena ke sona seo e neng e le matla a laolang bophelo ba Hae. Ke eona tšiea ena eo a re laelang ho e boloka.”—Ellen G. White, *The Desire of Ages*, maq. 329, 330.

## Lipotso tsa Puisano:

- 1. Selekane sa Molimo le Noe, Abrame, Moshe, le rona ke ntšetso-pele ea selekane sa Hae le Adama, kapa e ne e le ntho e ncha? Bapisa Gen. 3:15; Gen. 22:18; le Bagal. 3:8, 16.**
- 2. Hobaneng ha karolo ea likamano ea selekane ea motho ea selekane e le bohlokoa haholo? Ka mantsoe a mang, u ka ba le tumellano e tlamang ka molao, “selekane” le motho e mong, kante ho likamano tse tiileng. Tlhophiso ena leha ho le joalo, ha se seo Morena a se batlang likamanong tsa Hae tsa selekane le sechaba sa Hae. Ke hobaneng ha ho le joalo? Buisanang.**
- 3. Ke ka tsela e fe lenyalo e leng mohlala o motle oa selekane? Ke ka litsela li fe lenyalo le haelloang ho hlalosa selekane?**

**Kakaretso:** Ho kena ha sebe ho sentse kamano eo ‘Mopi a na na le eona qalong le lelapa la botho ka batsoali ba rona ba pele. Joale Molimo o batla ho buseletsa kamano eo e tšoanang ea lerato ka tsela ea selekane. Selekane sena se tšoantša ka bobeli kamano e nang le boinehelo pakeng tsa Molimo le rona (joalo ka tlamamo ea lenyalo) le tlhopho ea ho re boloka le ho re tlisa kutloanong le Moetsi oa rona. Molimo ka sebele sa Hae, a susumetsoa ke lerato la Hae le leholo ho rona, ke Eena mothei oa kamano ea selekane. Ka litšepiso tsa mohau le liketso tsa mohau, O re ferehela kopanong le Eena.